

Oqaaseqaatit nalinginnaasut

Siunnersuutikkut anguniarneqarpoq nersutit neqaasa ilivitsut affallu, suliffeqarfinit ingerlatsivinnillu neqinik agguinissamut akuerisaasunik atortorissaarutilinnit eqqussorneqartut eqqussuinermit akitsuummik akitsuuteqartinneqannginnissaat, taamaaliornikkut suliffissanik pilersitsinissaq anguniarlugu.

Siunnersuutip kingunerisaanik naatsorsuutigineqarpoq nioqqutissanik eqqussuinermit akitsuutitigut landskarsi isertitassaraluarmigut annikitsunik annaasaqassasoq, taasa ukiumut 500.000 koruunit missinginik, kiisalu aningaasarsianit akileraarutitigut isertitassat annikitsumik annertuseriassangatinneqarlutik. Isertitassatigut annaaneqartussat amerleriaatissallu annikingaarmata, nioqqutissanik eqqussuinermit akitsuutinut aammalu aningaasarsianit akileraarutinut missingersuutaareersunut ilaareersutut isigisariaqarput.

Naatsorsuutigineqanngilaq siunnersuutip allaffissornermut sunniuteqangaarnissaa.

Aalajangersakkanut ataasiakkaanut oqaaseqaatit

§ 1-imut

Siunnersuutigineqarpoq suliffeqarfiit neqinik agguinissamut akuerisaasunik atortorissaarutillit nersussuit aammalu puulukit nujuitsut neqaannik ilivitsunik affanillu akitsuuteqanngitsumik eqqussuisinnaanissaat, tassani piumasaqaataalluni suliffeqarfiup neqit aggoreerpata tuniniaqqitassarissagai. Nersutit neqaat aggoriikkat tassaapput neqit nersutip kuartianit mikinerusut.

Aammattaaq siunnersuutaavoq ingerlatsiviit neqinik agguinissamut akuerisaasunik atortorissaarutillit taamatuttaaq akitsuusiiffigineqannginnissaat, tassani piumasaqaataalluni neqit taamaallaat ingerlatsivimmit namminermit atorineqarnissaat.

Naggasiullugu siunnersuutaavoq suliffeqarfiup atortorissaarutaasa neqinik agguinissamut naleqquttuunerisa Avatangiisinut Pinngortitamullu Pisortaqarfimmit, inuussutissalerinnermut inatsisit atuuttut naapertorlugit akuerisaanissaat pisassasoq.

§ 2-mut

Siunnersuutigineqarpoq Inatsisartut inatsisaata ulloq 1. januar 1999-imi atortuulernissaa.